

COMUNICAU PO S'IMPRENTA - CERÀXIUS, SA SCOLA TZÌVICA DE MÙSICA TENIT UNA DIRETORA NOA

Sa scola tzìvica de mùsica de Ceràxius tenit una diretora didàtica e artistica noa. Francesca Romana Motzo, 45 annus, casteddaia, at a tenni sa trarea de cuncordai is atividades didàticas de sa scola in custu tempus tostau ocasionau de s'emergèntzia Covid.

“Unu scioberu chi a foras de sa professionalidadi manna e cumpetèntzia cunfrimadas de su curriculum de sa diretora noa, scardancat unus pregiuditzius chi a dolu mannu ddoi funt ancora in su mundu bia a sa diretzioni artistica, de sempri cunsiderau traballu po mascus”, narrant su sìndigu Gigi Concu e s'assessori a sa Cultura Roberta Relli. “Su fatu chi siat stètia scioberada una fèmina po cumpriri custu incàrrigu de capia, po mei, chi de sempri naru chi s'universu femininu tèngiat una màrcia in prus, e chi no si chèscint is cullegas mascus, est unu balori aciuntu”, sighit a nai su primu tzitadinu. “Donaus a sa diretora noa e a totus is cullegas bonu traballu, securus chi, aici cumentis est tarea de s'Aministratzioni, s'ant a agiudai a fai sa scola tzìvica de mùsica unu de is primoris de Ceràxius”.

Musicista, musicoterapèuta, fait parti de sa mesa permanenti mùsica 0-6 annus e est referenti de cussu e totu, in sa cumissioni 0-6 annus de su Forum Natzionali po s'educatzioni musicali. Sa diretora noa, una de is tres coordinadoras fèminas apitzu de 40 realidades in su panorama regionali, arregollit una disfida manna in una organizatzioni culturali chi contat prus de 300 iscritus e unu corpus de maistus cun esperièntzia manna. Intre is tareas suas de fundòriu: sa crescidura de sa scola imperendi progetusa chi ant a andai prus ainnantis de is atividades didàticas costumadas e intzaras stages, seminàrius, masterclass (apena s'at a permiti su Covid) e puru atruessu de sa cumpartidura e s'atòbiu cun is realidades culturalis de su territòriu. Sa esperièntzia sua de innantis dd'at bia Vice diretora de sa Scola tzìvica de Mùsica de Santu Sparau, apitzus de progetus chi ant imbordigau medas atras biddas partner e giai 400 pipius intre is 0 e is 10 annus.

At a èssiri acumpangiada de Tiziana Loi, cumentis vice diretora, chi liat sa esperièntzia sua de trint'annus in su sìtiu artìsticu, didàticu, apariciadori e in manera particolari in su territòriu cerexinu.